



PLAID SIN VIA

Nus essan gia amiez il giuven onn 2026. Las empreras jamnas ei idas sco da sgular e gl'unviern para d'accumpignar nus a moda speciala – ni ch'el vul gnanc accumpignar nus. Sia neiv che nus enconuschein gie bein, che cuarcla la cuntrada cun ina cozza alva e ruasseivla, ha fatg spitgar. Persuenter havein nus giu in unviern che ha schau veser e sentir nus con fetg ch'il nunusitau sa surpender nus. Midadas han era influenzau la veta dil vitg. Consteri havein nus stuiu prender notizia la fin da schaner dalla mort da nies preziau collega da suprastanza Rudolf Wieser. Objectivamein, cun premura e grond tschaffen eis el s'engaschaus per nossa vischnaunca.

El vegn a restar a nus en memoria sco persuna che ha luvrau cunscienziusa-mein, da maniera collegiala e culla finamira da contribuir il meglier pusseivel per nossa populaziun. En num dalla suprastanza communal admettel jeu a sia famiglia nossa pli profunda condolientscha.

Gest en tals muments reflectesch'ins con impurtont ch'igl ei da setener ensemen e da sustener in l'auter. Nossa vischnaunca viva da carstgauns che sefan valer, che surpندان responsabladad e ch'en cheu in per l'auter. Persuenter vi jeu engraziar cordialmein a quellas, seigi quei per lur engaschi el las uniuns, en professiun, veta sociala ni en famiglia.

Lein pia formar e sviluppar vinavon comunablamein gl'onn 2026 – cun speranza, respect e mirond anavon. Per las proximas jamnas giavischel jeu a Vus tut il bien, buna sanadad ed bia sentupadas motivontas.

*Franz Gschwend,
president communal*

IMPRESSUM:

Novas da Laax, ediu dalla vischnaunca da Laax
Cumpara: 4 x ad onn
Proxima ediziun: **29 da matg 2026**
Ideas per tematicas:
Tochen ils 15 da matg 2026
Redacziun: Domenica Flütsch
Contact: admin@laax-gr.ch



Niev local da giuventetgna SPAZI

LA CASA SPAZI RESVEGLIA

In niev liug da s'entupar el coc da Laax

Laax selegra ch'il menaschi ella casa multifunzionali SPAZI entscheiva.

Culla casa multifunzionali amiez il vitg da Laax havein nus a disposiziun in niev liug dallas sentupadas socialas. Il SPAZI dat spazi als contacts, al brat ed ad activitads comunablas per giuven e vegl. Naven dil fevver san ins reservar las localitads sur la nova plattafuorma d'affittaziun dalla vischnaunca. La suprastanza communal ha approbau il regulativ d'utilisaziun e fixau ils prezis d'affittaziun, ils documents corrispundents ein publicai silla pagina d'internet dalla vischnaunca.

Aunc buca diltut finidas ein las lavurs els dus plauns sut: La gruppa da giugs sco era il local da giuventetgna vegnan ad esser fini el decuors dalla primavera e las

lavurs dil contuorn cuozan tochen viaden il matg.

Specialmein selegrar astgan ils giuvenils: Culla fin dallas lavurs da construcziun han els a disposiziun in niev local da giuventetgna. Quel han ils giuvens carschi astgau concepir per part sezs. Il post uffical dalla lavur per affons e giuvenils entscheiva gl'avrel, aschi prest che la nova direcziun entra en piazza. Naven da lu vegn il local ad esser aviarts regularmein – sco liug da s'entupar per las scolaras ed ils scolars dil scalem superiur sco era parzialmein per affons dallas classas primaras pli aultas. Ulteriuras informaziuns suondan il mars ed era ella pagina d'internet dalla vischnaunca. La vischnaunca ha gia ussa plascher dallas biaras sentupadas e da muments comunabels el niev SPAZI.



Ils giuvenils durant ch'els lavuran per «lur» local da giuventetgna.

ADATTAZIUN DIL REGULATIV D'AFFITTAR ED UTILISAR L'AULA (CASA DA SCOLA):

Cull'entschatta dall'affittaziun dil Spazi ei era il regulativ d'affittar ed utilisar la casa da scola Grava/aula vegnius surluvraus. Ils dus regulativs, Spazi e Grava/aula, ein harmonisai in cun l'auter ed ins sa reservar las localitads naven da vendergis, ils 27 da fevver 2026.

RADUNONZAS COMMUNALAS

Sonda, ils 11 d'avrel 2026

Sentupada annuala da buna cumpignia – suenter la radunanza communal

Sonda, ils 11 d'avrel 2026 envida la suprazion communal puspei las habitantas ed ils habitonts da Laax alla radunanza communal cun tscheina communal. El center da quella ein ils rapports annuals digl onn passau 2025 sco era las elecziuns substitutivas.

Venderdis, ils 12 da zercladur 2026

Radunanza communal extraordinaria pert. la consultaziun dil project dalla revisiun dalla constituziun

En connex culla consultaziun publica davart la revisiun totala dalla constituziun ha la suprazion communal retschert tuttas posiziuns ed engrazia alla popula-

ziun per la participaziun activa. La suprazion vegn a verificar ils impuls e las propostas e tractandar aunc ina gada gl'entir project. Quella fatschenta impurtanta pretenda dapli temps per la presentaziun e pil tractament. Per quei motiv ha la suprazion decidu da tractandar e presentar ella ad ina radunanza communal extraordinaria ils 12 da zercladur 2026.

Vuleis Vus s'engaschar activamein per la vischnaunca da Laax e savessas Vus s'imaginar da far part dalla suprazion communal? Cun Vies engaschi e Vossas ideas contribuessas Vus essenzialmein da formar activamein il futur da nossa vischnaunca. Mnus selegrein da tuttas persunas ch'ein prontas da semetter a disposiziun pil beinesser dalla cuminanza e dalla vischnaunca.

AGENDA

Sonda, 28 da fevrer 2026

Teater

Il CB Laax envida cul toc: «D'Gedächtnislücka». 20.15 Uhr, Aula Grava
Naven dallas 19.30 ustria

Dumengia, 1. da mars 2026

Prelecziun

«Da war noch was». Erwin Caduff raquenta da sias aventuras silla via da sogn Giacun tochen Santiago de Compostela.
Allas 18.30, Biblioteca Laax

Sonda, 11 d'avrel 2026

Festival da schlagers «Schnulz im Sulz»

La sentupada da narr ella neiv da primavera.
Dallas 11.00 – 17.00, Stalla Alp Nagens

Sonda, 11 d'avrel 2026

Radunanza communal

Allas 16.00, aula Grava. Silsunter: program accumpignont (apéro e tscheina)

Venderdis, 12 da zercladur 2026

Radunanza communal

Allas 20.00, aula Grava

Suentermiezdis per seniors:

5 e 19 da mars 2026 / 2 e 16 d'avrel 2026

LA VISCHNAUNCA DA LAAX INTRODUCESCHA LA DAMONDA DA BAGHEGIAR DIGITALA

Tgi che planisescha in project da construcziun a Laax sa ussa registrar ed inoltrar sia damonda cumadeivlamein online sut <https://ebau.gr.ch>.

La plattafuorma eBau meina ils utilisaders pass per pass atras l'entira procedura. Cunquei simplifichescha la vischnaunca ils pass ch'ein necessaris per inoltrar ina damonda da baghegiar, ella dat in signal per in'administraziun moderna e datier a convischinas e convischins.

Il formular digital ei concepìus a moda logica e muossa ella finiastra mo talas damondas ch'ein relevantas pil project corrispundent. Texts declarativs cumpletonts gidan d'emplenir correctamein il formular. Ils plans da baghegiar san ins cargar sco dotecatas el format PDF. Pil patrun da baghegiar eis ei in sistem surveseivel, spert e confort-

abel. In ulteriur avantatg dat ei: Gl'inoltrader sa controllar da tuttas uras online il stan actual da sia damonda da baghegiar.

Era per la vischnaunca ed ils uffecis cantunals ha la midada mo avantatgs. Parallelamein cun inoltrar la damonda alla vischnaunca san las autoritads cantunals ed ils uffecis prender posiziun en connex cun cundiziuns e pretensiuns. Quei levgiescha ed accellerescha l'entira procedura administrativa.

Impurtant: Malgrad ch'ins sa reglar la damonda da baghegiar a moda digitala, ston ins tuttina inoltrar in exemplar cumplet dils plans inclusiv la quittance. La midada cumpletta silla procedura veramein mo pli digitala vegn a suandar pli tard. Sch'ei dat damondas e malsegirtads en quella caussa ei gl'uffeci da baghegiar dalla vischnaunca da Laax bugen a disposiziun cun cussegl ed informaziun.

CANAL WHATSAPP



Scannei il code QR ed abboni il canal, e Vus retscheveis las informaziuns directamein dalla vischnaunca.

Vossas coordinatas persunalas sco maletgs da profil e numras da telefon restan zuppadas. Per garantir l'actualitad dallas informaziuns vegnan tuttas contribuziuns e texts stizai automaticamein suenter 30 gis.